

七香齋詩抄

161  
42

161-42



\*1200800111718\*

Kodak Gray Scale



© Kodak, 2007 TM: Kodak

A 1 2 3 4 5 6 M 8 9 10 11 12 13 14 15 B 17 18 19




Inches 1 2 3 4 5 6 7 8  
cm 1 2 3 4 5 6 7 8 9 10 11 12 13 14 15 16 17 18 19

Kodak Color Control Patches

© Kodak, 2007 TM: Kodak

Blue Cyan Green Yellow Red Magenta White 3/Color Black






七香齋詩抄

疇邛堯署










161-42



序

詩言志也。言而無聽者則廢矣。此先哲所以痛嘆也。昔者杜樊川手錄其詩百五十篇獻之。啓曰。握風捕影。鑄木鏤冰。敢求恩知。但希鏤琢。所獻無主名。不可知爲誰。唯錄焚餘以托知音。其志可知耳。許丁卯亦集其詩。命曰烏絲闌。其叙有言曰。雖志有所尙。而才無可觀。又云。置於几案間。聊用自適。非求知之志也。似與杜異迹。而惜廢則一也。余寄傲于文字。發志于詞章五十年。今抄吟草百之一。以爲一冊。願贈知音。

7. 5. 23

內交



非排悶發憤。又非恐廢之云。若幸得一讀。則未必無裨於世教也已。

大正七年戊午仲春 七香齋主人識

七香齋詩抄

七香齋詩抄

南岳 藤澤 恒著

辛卯歲旦書院行

聖敕奉讀式恭賦之

書堂天未明。捧 敕讀起儀肅然。氣和身亦暖。恰似  
大陽升東天。順之則榮背則壞。人道典範維此篇。願  
推此篇遍照海外國。化得外人長作君子人。

短歌





我不能冲青雲。試雄翅。又不能擲萬金。掣大利。自稱前身是白蟬。竟向圖書堆裏棄。文苑闢得無稅田。令甲不尅自封地。十日鍊一句。五日磨一字。百年日月并消磨。空了一生不曾愧。今古茫茫付東流。到底豈有不朽事。

天下茶屋

一自龍車賜寵光。勝名不獨屬猿郎。滿園花木春風富。長爲遊人逗御香。

病中雜詠

叱呵猛士撻英雄。麟閣元期錄大功。海鎖忽沈外交盛。乾綱一變舊章空。便知枘鑿難容議。猶喜文翰足托躬。自棄從來無所管。芸窗遮莫臥西風。閑庭小雨浥秋芳。也爲佳辰侑玉觴。酒浸黃花存舊典。飯蒸紫栗有新香。節當誕日年加壽。病正瘥時體覺康。會友團欒聊自賀。唉迎三十四重陽。

書適

娛日法書古畫。洗心芳茗閑棋。甘此無名無利。任他呼點呼癡。



雲颿間中翁者北總人也。爲人慷慨悲憤。開口見肝膽。蓋并其善感善泣。得高山氏遺風者。明治丙子以職來浪花。余乃得相識。歲之十月。以病歸鄉。余爲悵然。乃步高山操志所載翁詩韵以贈之。

痛哭多年聲幾吞。奈何風雨暗乾坤。書如晁賈培忠膽。碑擬許張招義魂。湛露幸逢王室盛。甘棠須使大恩存。數奇休道無知己。自古成蹊在不言。

放吟

放吟不求和。只伴蕉雨敲。此心與世背。應須息遊交。子雲何把玄經筆。却爲世人著解嘲。

讀棋譜偶成

宛乎八陣圖。莫道是兒戲。死生只一著。安危在布置。自咲當局時。下手何容易。容易多取敗。不啻一枰事。

小楠公墓下作

疾風捲飛沙。黯慘天將雨。骨寒魂亦消。荒疇立弔古。一弔一欽心。悚然。荀屋村東孤墳前。飢烏驚飛老楠暗。分明想得正平年。猾賊欺天山河裂。毒氛噴發滿



七香齋詩抄  
乾坤干戈旁午不可戢。紫雲纔懸南山巔。維此三年  
春正月。賊軍大舉侵南山。公也夙知國事終難拄。欲  
以一門腔血報天恩。冷鏃彫出卅一字。字字精神  
迸血淚。旌旗去向飯盛山。猛威奮突挫賊騎。叱咤手  
擲血鬪髀。驅逐殆將斃賊帥。衆寡竟不敵。宿志亦蹉  
跎。三百親兵殲。平原血作河。兄弟餘勇在。雨箭集若  
蓑。殷蓑血淋漓。嗚咽恨如何。耦刺繼父志。舉族膏斷  
坡。爾來五百歲。精誠長不磨。去歲賢令新興役。剡山  
鑿取一大石。高標忠臣千古心。新碑一丈有五尺。不

虧以揭臣子範。擬爲皇家輔赫奕。嗚呼今也昇平  
人重倫。墮淚孰不感忠純。只恐泰否往又復。今古一  
轍如轉輪。一值時否則昏惑。利害誤人名義泯。他年  
風饕雨虐日。不耻此石能幾人。

過臥龍橋

橋在河州古市

古陵松柏鬱蕭一。依芾石川濃綠遙。世事近來渾不  
問。引筇閑過臥龍橋。

題書齋壁

君不見西樓月落花間曲。吟犯帝座寵却篤。又不



見狂官自古世呼名。流竄徒作不平鳴。一屈一伸皆  
一夢。寵辱何用驚且慟。只知不朽在文章。擬托翰林  
爲鸞鳳。斯心出入真無時。何由學得杜德機。物也交  
物則攘奪。不免爲物生憂悲。時俗偷薄多詐變。翻雲  
覆雨不堪見。巷伯貝錦嘆萋菲。翟公交態感貴賤。人  
間竟無耐久親。與孰優遊葆天真。只須此齋迎風月。  
頌讀陶然友古人。

咏閑適

留僧竹下評茶。迎月梧邊弄篴。畢竟心閑物閑。便誇

所適皆適。

權歌

朝伴江上雲。暮伴湖上雨。雲雨世情外。長作江湖主。  
讀得菴敬字二君倡酬詩有感。乃步其韻。

奈此滿胸磊砢何。日昃西窓鼓缶歌。迷海渺茫人胥  
溺。澆世誰能拄頰波。薄俗偷風眼中變。春敷秋落容  
易過。五弊九法方將斲。憂悶只向此際多。辯論豈敢  
比髡夷。文章又何攀卿軻。將欲濟世亦無力。大耋之  
懼獨自嗟。忽聞學士與居士。唱和琅琤意無涯。一則



杞憂憂曷已。一則莫哀哀。更加筆鋒俊邁。誰得敵情。  
事却憐心。卽魔悲憤。到底愛國語。杯中恐無辨弓蛇。  
肝膽傾吐真豪杰。言語不怕觸網羅。精誠凜烈人感  
動。便知詞藻非空華。吾也瞠若徒慚愧。涓埃曷日報  
邦家。一路春風草香處。徘徊且探療愁花。

送得菴歸東京疊前韵。

人心變動竟如何。乍號咷兮乍笑歌。笑歌號咷渾無  
迹。世事須付東逝波。欽君六塵一掃盡。光明拳頭悟  
了過。色相之外具真眼。覺路開通樂地多。況又別離

尋常事。交情不肯論坎軻。海內若使知己存。隔地千  
里不用嗟。只有一言君幸聽。世紛誤人實無涯。天真  
固在閑地全。巨患常從樂處加。宇宙滔滔才敗德。守  
本當知菩薩魔。虎成其群殺其母。失神害毒於毒蛇。  
防之有術維虛靜。虛靜卽免雉離羅。言終勸杯君已  
醉。醉裡又未夢豪華。半醉半醒人環坐。陽關唱罷負  
郭家。不如歸去聲何處。細雨紅滴杜鵑花。

四海清 御題

四海清。四海清。海不揚波泰階平。萬邦仰。萬邦仰。邦



乞和親爭來享。祝砲高轟海之濱。萬舶章旗映日新。  
白雉將入貢。人心只歸仁。爲問萬邦諸父老。知否中  
國有聖人。

中村三蕉寄詩步韵酬之。

都市士風各異門。同心誰作如蘭言。迢迢却在千里  
外。海南君子姓是村。村君陰德多陽報。老健愛文多  
福到。阿有晚翠讚冲堂。左右提携耽嗜好。上校教童  
不厭勞。一生樂事屬兔毫。課餘笑對青山色。斗酒傾  
盡醉陶陶。唱酬多年珠玉集。修理近聞手自緝。海內

交友元應多。枉言記一不識十。忘老乾乾尙自強。人  
世浮沈渾相忘。寄吾長歌尤宏贍。字字精神勢飛揚。  
人情近來薄於紙。頽波倒瀾無底止。謝君厚誼依然  
存。不才何以酬知己。強將和什供君觀。蕪襍愧他缺  
爛斑。只願逍遙風塵表。與君長保冰雪顏。

疊前韵寄晚翠

山是双劔海鳴門。奇觀壯快不容言。文章自得神靈  
助。欽君身住海南村。誰將近況向君報。朶雲一片過  
海到。詞意懇悃語簡適。交誼何幸修舊好。此生愧爲



風塵勞。意氣近來微似毫。聊有筆硯托餘興。圖書堆  
裡樂陶陶。遠近詩筒如蝟集。左支右吾不能緝。便聞  
海南諸老師。唱酬已成篇幾十。自顧碌碌年尙強。薰  
陶之惠何可忘。一呼傾盡酒三斗。吟心爽快忽奮揚。  
疊韵詩成上素紙。技癢自笑不可止。風流兼欲說時  
情。時情無奈不適已。都城文物渾異觀。舊章不復存  
一斑。爲報東山峰幾疊。濃翠不改舊時顏。

三疊韵寄冲堂

皇揆本屬儒生門。不朽所期在立言。文是韓柳詩李

杜。奏疏兼擬趙柯村。兩世寵祿以何報。措大心事難  
精到。此思全同君與吾。握手且修通家好。值變不辭  
奔馳勞。一死自甘輕於毫。議事堂堂局開日。藩政聊  
欲輔甄陶。學制一變憂先集。枘鑿卽知難統緝。同時  
辭職年殆倍。君過五十吾三十。翰墨欽君老愈強。胸  
襟洒落俗情忘。吾也忽向浪華去。風塵埋面志不揚。  
相思祇托赫蹏紙。詩話文談不曾止。世夢一覺忘故  
吾。交誼千秋感知己。想起獅巖同遊觀。滿山霜樹秋  
斑斑。不住菴中三杯酒。夕陽穿林照醉顏。



樓上醉書 吟社課題

眼界果從高處豁。醉倚危樓氣鬱勃。寸馬豆人畫中看。不知那處有英傑。鬪智鬪力何容易。興亡治亂機如髮。別有大道知者稀。千古閑了幾賢哲。睥睨乾坤立多時。風吹木葉冷心骨。去鴻杳杳影欲無。山角夕陽紅一抹。

湖心亭小集席上賦呈諸友 有引

庚寅暮春。余遊東京。東京諸友會于湖心亭。以飲于余。會者則岡本黃石松岡康毅西岡

宜軒三嶋中洲等三十餘人。此日天氣清朗。興情頓旺。

東叡山頭逗夕曛。長醪亭上酒方醺。清池雨霽鳥聲濕。斜塢花飛帘影薰。故態誰言多白眼。舊交此際半青雲。西園雅集趨芳躅。應有高才裁妙文。

聞黃海捷報作

手提捷書起狂呼。若此快戰古來無。黃海秋高氣慘肅。一擊鏖殺索頭奴。奴艦二十我十二。團如車輪張如翅。馳突犇迅疾於風。一退一進角神智。巨砲轟天



天疑拆。水雷激地地欲碎。洪濤怒起助勢威。銃丸亂  
飛如雨墜。我軍奮躍勇氣倍。擊破奴艦似掃地。近世  
兵家說一新。器械利鈍勝敗存。彼亦競制甲鐵艦。載  
將巨煩鎮海門。定遠來遠及經遠。并他四艦尤精堅。  
恃之傲然向大東。欲逞猛志展威權。何料三隻沈沒  
四隻燒。自餘艨艟盡敗殘。我軍鼓舷又扣槳。唱起奏  
凱歌一曲。烟收風死波濤靜。星月皎皎海山綠。嗚呼  
東西今古海戰多。尤推英人特拉華爾牙。試以比此  
戰。艱易豈同科。鐵艦勿言堅。巨煩且休誇。小大衆寡

不足筭。制勝畢竟在人和。人和妙用不可測。威風宣  
揚無窮極。五千萬民同一心。忠誠之士齊戮力。邦俗  
雄偉雖自古。教化實仰 聖上德。從今宇內第一強  
勇名。歸我大東日出國。

辛卯歲晚兒元寄偶感作步韻却寄  
志期高逸節期清。不願浮名壓帝城。莫學人間新倩  
麗。須存胸裡舊崢嶸。微雲淡月彌天思。孤雁寒鷗隔  
地情。休訴霜辛兼雪苦。春風祇自此中生。

富嶽



東海君子邦。嶽雪千秋色。峰則干九霄。根則壓三國。  
芙蓉玉削成。巍然照殊域。非此温温容。安得表皇  
德。

古錦

制裁宜適好。堪誇不學隋。帆謾傲奢。旌示武威懸日  
月。冠隨品位插花葩。仙樓昔織雙栖鳳。人世今傳一  
片霞。却想二千年外事。貢輸舶滿海之涯。

古劍

毛髮竦然魂欲消。稜稜紫電射雲霄。英雄志氣霜三

尺。忠烈心腸鐵一條。桶峽夜飛千壑雨。稻碕晨退半  
灣潮。威靈何處尤嚴肅。廟祀堂堂服百妖。

古碑

欲補史編偏博搜。閱來不是詫風流。草荒多賀城邊  
路。月冷益田池畔秋。谷變陵遷何足愕。雨殘苔蝕暗  
爲愁。一千六百年前迹。探得高麗古洞溝。

鳥聲

嚶嚶何所友。窓底覓詩人。柳綠花紅外。呼回天地春。

鐘聲



夜深聲最冷。霜月想楓橋。一入張家句。千年凝不消。  
笛聲

梅花何處落。三弄帶斜陽。江上微風夕。倚樓詩有香。  
一笑

呼玄呼素將無同。卓爾誰存國士風。一笑觸蠻爭未  
判。人人自信是英雄。

寒夜待友

待友閑煎當酒茶。寒窓竹影翠烟斜。誰知詩句勝棋  
子。敲落吟燈花又花。

與醉處同飲次其韻

一川秋雨一欄風。夜飲回春銀燭紅。多謝醉吟同握  
手。交情依舊酒杯中。

英公二百五十年祭筵恭賦以薦

仙桂玉蟾秋奈何。金波萬里是恩波。百年清影人皆  
仰。偏向紫雲山下多。詠月

西施含顰圖

其美是天真。顰時亦妖冶。咄汝勿妄顰。恐有傲汝者。  
寒霞溪



猶是倪迂畫裡看。奇峰夾路路回盤。草亭欲問舊題  
字。一抹溪霞秋樹寒。

訪北河諸友

一村雞犬一林霞。小路依然傍水斜。不作人間桑海

嘆。劉郎重訪舊仙家。

十八年水害後缺然不能問之今茲重遊故云

吟會席上賦似諸友有引

逍遙遊社約成既已十年。社友議設此筵以

自賀。

藍評朱批燦生光。映發吾儂錦繡腸。爲許逍遙十年

事。裁來天地活文章。

與帆山南湫半雲南州樂水訪宮津昌堂別業。

席上分濃淡雲山堪入畫蕭閑門逕自宜秋句

爲韻。余得雲堪秋三字。錄一

疎簾影動老龍紋。繞屋長松積翠分。輪奐築新添瑞  
色。蕭岑境古絕塵氛。圓窓近指須磨雨。高厦遙含鐵  
枵雲。此日訪尋歡那盡。前林一任欲斜曛。

瀧坂觀楓。與諸子同用樊川詩韻。似某公。

枉取吟身委狹斜。詩爲生命酒爲家。憑君欲問秋林



色孰與楊州一夜花。

長嗟

一見一長嗟。一聞一長嗟。長嗟又大息。痛殺賈長沙。  
長沙非無治安策。老泉又曾草審敵。夙知空言無所  
施。猶說天驕真可惡。柔能制剛是良圖。以暴易暴又  
何益。服敵只令德。得民是至仁。國安由民定。守固在  
四隣。長嗟長嗟嗟何已。杯酒三斗澆磊魄。朔風何日  
轉爲東。深紅濃綠滿四海。

晚春郊外有引

此題。天保丁酉暮春。先春吟社諸彥來會于  
我泊園書院所賦也。今茲暮春。逍遙遊社諸  
彥來會。歲實次丁酉。乃共賦此題。前後相距  
六十一年。得趁前日韻事。亦文苑之一雅事  
耳。

黃鶯啼老綠楊林。游屐何邊試醉吟。日暮江村過雨  
後。香泥一路落花深。用先子韻

笑圯

一月笑幾回。相逢須相咲。非知一笑難。爭解三咲妙。



自嘲

平生豪氣未全消。世路奈其危且遙。堆案文章皆紙  
虎。滿城冠帶半人貓。謾期隻手挽頽俗。堪笑扁舟凌  
逆潮。一唱自嘲前日句。百年心事敗芭蕉。

自幸

樗櫟從來保百年。不才自幸絕塵牽。山中採藥雲迎  
屐。灘上叉魚雪滿船。殘月流螢隨夜讀。飛花啼鳥伴  
春眠。非詩非畫又非酒。放浪人呼作散仙。

王博士墓在北河藤坂。郡司祭之。儀頗盛矣。乃

賦。

孤墳千歲古。殷祀一朝新。散此焜蒿氣。結爲文字因。  
雍熙逢 聖世。明哲慕賢臣。共唱梅花什。香魂方值  
春。

前七尙并引

老杜八哀。哀于其世也。溫公七愛。愛于古也。  
哀者惜其人。愛者慕其人。皆有感于今古耳。  
余亦有所尙。情感特切。蓋尙友之方。子輿氏  
所指示。豈可不從事于此乎。獨賢哲之士致



身朝廷。事業赫赫。照映千古者。余不敢企望。  
故所尙在。遜不在顯。庶幾志可則焉耳。

宸眷一何重。長傳玄豹名。豹也徒留皮。不及此名聲。  
莫怪王濟癖。似作冀北鳴。寡欲天性美。志氣亦恢宏。

一臥南山麓。陶陶答聖明。藤春津

裊裊富山烟。岌岌秋澤鷗。可以寫吾心。心迹誰能必。  
談兵將軍府。非窺曹瞞室。挫銳高雄寺。非探雄狐穴。  
永言亦餘事。非耽三十一。有言猶無言。玄旨竟空濶。

僧西行

濟世宿志在。何敢辭奔馳。鞭馬鴨嶺險。又犯南海危。  
一舉得大捷。班師護丹墀。何圖猜忌子。迷誤截四肢。  
乃向北溟去。就安老邊陲。至今蝦夷地。香火奉禱祠。  
史乘多誣枉。誰爲辨嫌疑。千古勤王志。只有物翁知。

源廷尉

愛吾清悅子。所悅何因緣。非僧又非俗。潛匿東奧邊。  
時有同心友。應答如湧泉。談文又論武。才氣欺神仙。  
雖非書劍客。實爲草澤賢。膝下一朱匣。物色想當年。  
相招以茶醺。來賁乃惠然。自稱尋香者。鬼蝶只翩翩。



翩翩一場夢。恥以姓名傳。清悅子

三愛記可誦。所愛真風流。香淨花亦美。可以侑新篋。  
偶爾值美日。山郭時出游。似慕老聃迹。來往跨野牛。  
金箔塗其角。豈無似羊裘。牡丹花自比。黃綺維同儔。  
篇什只寄傲。心事竟悠悠。三愛真可愛。餘香壓千秋。

肖栢叟

詩仙三十六。東山三十六。六六豈吾名。烟霞可餐服。  
轅門擲首級。一夢亦蕉鹿。養老詩酒中。不回以干祿。  
鶴書自可辭。非敢驚凡俗。丹心只耿耿。不渡蟬水綠。

石丈山

茶味真淡泊。愜吾脫世旨。賣去入市城。非誇三椀美。  
翻然燒茶具。薪盡見真理。烟消灰散處。心似中冷水。

賣茶翁

後七尚并引

李滄溟云。不朽者文。不昧者心。有斯心者。誰  
不嗜斯文。余托身于藝苑者數十年。翰墨自  
樂。固非期魏文所謂經國大業不朽盛事也。  
頃日賦七尚以頌隱士。或謂余曰。子嗜文藝



以自娛。有似謂不願人之文繡者。則於藝林。亦必有所尚。曰。然。乃有此頌。

源泉混混不可測。至文無聲又無色。自娛一集見肺肝。大疑有錄仰卓識。演出九訓語語真。乃爲聖經生羽翼。生涯不弄無用文。天下至今浴遺澤。貝原益軒

吉光之裘雲錦裳。人間始見真文章。天孫機軸幾變幻。丹穴于今栖鳳凰。蒙莊鄭列以爲紀。周誥殷盤以爲綱。意氣排秦又壓漢。那事枉稱明李王。闢得東壁圖書府。風化蕩蕩遍八荒。真個芙蓉白雪色。仰看邦

家千年光。物徂徠

玄裳縞衣仙家禽。清喉相和聲在陰。去天尺五天能聽。原文原教悉德音。九臯千古紹述美。慥慥長見君子心。伊藤東涯

八栗山頂何嶢峴。上有五劍側峩冠。山氣濺下千萬丈。落向大海作紫瀾。回風捲去天地動。枚叟七發驚壯觀。不以小著欺小兒。只許日月照肺肝。斗南八月秋天高。文彩稜稜劍氣寒。柴栗山

仙苑燦爛簇春華。卽是秦代舊烟霞。一掃杏艷桃嬌



去。清芬奇氣別一家。筑海竟續營公化。蜚英名聲浩  
無涯。斐然館中培養力。發作鎮西萬樹花。龜井南溟

愛日樓兮愛日樓。文華風采照千秋。筆端縱橫無停  
滯。吞吐韓柳又蘇歐。悟得閑雅不迫法。與他心迹共  
優游。優游八十有餘歲。手握文柄無遺籌。冬日之日  
實可愛。雍容文苑第一流。佐藤一齋

銀鞍錦鞵鐵馬鞭。萬騎齊下萬仞巔。叱咤風雲御雷  
霆。恍似桶峽碎中堅。此老用字如用兵。滿肚韜略真  
無前。兒童莫不誦外史。走卒皆歌兵兒篇。正氣噩噩

筆鋒銳。感發人心豈偶然。卓矣麟閣功可勒。捧將西

日再中天。賴山陽

高山彥九郎墓下作

一苦纔除又一酸。憂時誰不慕忠肝。悽然泣掃苔碑  
立。飛霰打衣狂籟寒。

訪習田雪峰

相遇只微咲。歡心不可言。輕簾雲影動。老樹漏晴暎。

觀棋

敏手丁丁子若飛。兩軍旌旆有餘輝。謾攻殘壘多招



死。徒逐歸師却陷圍。孫子歸師勿逐岐北白鸚時守默。天中記唐姚洎善棋

號白鸚鵡關西黑獺巧藏機。宇文泰字黑獺羸輸驚見瞬間變。制勝

從來在慎微。

乍如相逼乍如逃。著著不差釐與毫。闔關從橫欺衛

霍。上四字李嚴基賦字面方圓動靜悟鈴韜。方圓動靜李泌因觀棋所賦事見世說白河霜落

秋風冷。黑海雲開旭日高。戲罷漸收奩子去。快談朗

吟氣雄豪。

隣交亦自此中求。一局手談當獻酬。王子本知無敵

手。西溪叢語蔡州褒信縣有棋師闡秀才說嘗有道人善棋凡對局率饒人一先有詩云爛柯真訣妙通神一局曾經幾度春自出洞來無敵手得饒人處且饒

人主人枉說鎮神頭。杜陽雜編大中日本國王子來王子善圍碁使顧師言為對手至三十三下勝負未決師言懼辱

命汗手凝思方敢落指謂之鎮神頭乃是解兩征勢也王子瞻目伏為不勝寬容到底吾邦事。遜讓由

來賢士流。珍重晏嬰千古迹。折衝樽俎實良籌。

### 村墅襟吟

林屋春深佳氣融。詩城自吟為誰雄。閑惟利走名犇

外。樂在紅明綠暗中。樵水漁山憐落落。三平四滿付

空空。晚來例酌村醪罷。去趁飛花香處風。

渚鷺汀鷗亦可群。郊村酌致足幽欣。吟心寢屋名川水

南水。禪味摩耶雲外雲。柏紫楓紅歸寂寂。人情世態



任紛紛。樂吾樂矣。適吾適。落日樽前酒一醺。

香似真禪次第參。秋花影冷薜蘿菴。襯簾山骨滴空

翠。隔水笛腔吹夕嵐。節近重陽園九九。名園友迎二仲

徑三三。此中快事知何物。驚座之書清耳談。

櫻

芳野春風真可誇。朝暎映處簇仙霞。一王號定三千

歲。全世界中無此花。

華甲壽筵歌

及門子弟稱三千。知恩報師慕昔賢。華宴招吾祝花

甲。至情周到溢壽筵。天賜新晴人群集。高樓百尺枕

淀川。佳章妙畫各秀美。白玉案頭堆彩箋。奇才尤推

蘇黃筆。三都名士三山田。回春別有喫茶室。揮毫場

亦簇雲烟。自顧悚然且自失。碌碌消過六十年。更生

之身從今始。為國更結文字緣。笑問傍人人盡醉。醉

舞高歌皆似仙。斜日射欄光燦爛。滿座歡笑氣藹然。

甲辰歲旦

晨雨乍晴佳氣浮。昇平恩澤遍皇州。共言龍歲多

祥事。且聽虎臣裨偉謀。荒土要開新日域。老身長保



舊風流。清忙却領閑中樂。試筆何辭幾唱酬。

寄矢士錦山

前日書讀桃源記舊作以贈乃用其韵

突將壯士舊無前。慚愧墨客潛硯田。願君投筆隨大

使。

春畝公爲遣韓大使將以仲三日發

當賦大功勒燕然。記否暢園所獻畫

成兆。變和東洋美人仙。

美人乘大龜背手以紙作鶴圖北齋所作也暢園前歲以獻公

送章也從軍

投筆伍貔貅。去蹈滿洲雪。一劍鏖驕胡。隻手探虎穴。

聖恩不可忘。敵愾氣勁烈。驪歌壯汝行。不是尋常別。

際會此未會有時。人生幸福何過之。

擊敵勿輕之。慄悍而獍獠。撫卒勿輕之。至尊所恤

愛。彈藥勿輕發。資財勿輕費。招禍在欲速。成功在能

耐。輕也輕也多敗失。自重自慎是要術。

投身砲火裡。萬死勿訴艱。埋身霰雪底。慘慄勿訴寒。

浩氣塞天地。忠義勒肺肝。須悟運用妙。只存方寸間。

背涅四字照千古。良師有個岳忠武。

聽雨會吟友于洗胸亭。有作用伊藤東涯詩韵。

乃步其韵。

不管世情炎與涼。舊交幽約會林莊。古都文物似江



左。元老休動推涓陽。飄逸將吾饒醉迹。笑談伍此鬪  
詩場。筆花詞藻芬菲外。和氣藹然春滿堂。

輓得菴居士

畢生濟世是英雄。正氣堂堂迹不空。歸去道山消息  
絕。飛花滿地雨餘風。  
大道本來祇坦然。功名富貴亦奇緣。想曾共對嵯峨  
月。一榻茶烟話老禪。

玄海大捷歌

蔽海敵艦三十隻。酣戰一夜碎無跡。宇宙茫茫三千

年。未曾有此大功績。碎之者誰東將軍。戰罷奏捷唯  
片言。露艦第二第三隊。殲矣。宸襟幸賜安。屠戮長  
鯨斷巨鼇。海面如洗靜無濤。致人于險策何偉。擊滅  
全隊膽何豪。掣機弄敵如小兒。占得地步眼何高。海  
權從今歸我掌。皇威堂堂萬國仰。迺與萬國同百  
福。賈船商舶任來往。皇基終得磐石安。聖化四  
被德蕩蕩。君不見旭光赫赫海波綠。萬國齊唱太平  
曲。

遊照蓮寺。觀春水茶山諸先輩遺墨。乃作。



詩話禪堂了妙因。先賢遺事墨痕新。空庭只有一池水。長照蓮花社裏人。

讀書樂十吟并引 錄二

遊有雅俗。歡有清濁。事已千緒萬端。情亦愛憎不一。是以吾心賞之以爲無比。在他人則鄙而棄之。遂各從其所好。雅果不雅。濁不必濁乎。雖然歡娛未了。悲哀踵至。樂遊纔歇。悔恨次之。豈可謂佳境乎。乃知吾曹心賞。獨占廣胖之真。有益而無損矣。昔人有此吟。乃倣

顰云。

萬梅林裡小茅廬。馥郁香凝月上初。清絕境存奇絕樂。滿身花影讀仙書。  
一畝菊芽經雨鋤。數株柳髮倩風梳。老來兼養生生樂。時讀鄰翁種樹書。

贈吉嗣拜山

奇傑之才神所降。氣骨稜稜不可當。底事天旻右腕去。翻然委身翰墨場。有聲無聲王蘇迹。青箋揮去粲有光。漫遊蹈破禹域地。四十年來名聲揚。冰魂鐵心



老愈美。起臥優游梅花莊。天拜山色千古綠。一枝骨  
筆萬世香。君不見腰間陸離印勝劍。古篆刻出獨臂  
王。

猿

嘯處雲埋樹。啼時月印灘。天真祇自適。不肯著衣冠。

觀心寺

雲埋古陵晝蕭森。長松老杉綠千尋。孤碣欲勒嗚呼  
字。赫赫忠臣千古心。寺門又添新風致。櫻花爛漫春  
可愛。溪樓把酒憶昔遊。經過早已三十秋。并將舊友

入慨嘆。悲歌痛飲思悠悠。陰風驀地吹怪雨。紛紅碎  
綠影旁午。似警安能不忘危。彼此一時感今古。咄咄  
境爲韞爐人爲鍊。千世萬世鑄忠烈。

依水園雅集

與藍田介堂及平城吟社諸友同賦

依水彎環清可涉。翠門佳色林巒疊。一籬秋老雨餘  
花。數樹紅濃霜後葉。舊社詩盟好屢尋。同人浩氣長  
相接。交情不爲合離移。醉裡乾坤夢中蝶。

偶感

併新舊作得五無用乃乞和于諸友 錄三

微醉閑吟冷笑春。花飛蝶駭豈關身。唯存憂國一絲



念不作百年無用人。

竹榻多風由室虛。午窗高臥雨晴初。不期一枕周公夢也。晒腹中無用書。

儒亦可坑書可焚。淫辭邪說亂紛紛。祖龍一死乾坤寂。狼藉人間無用文。

遊巖嶋賴士大來迎。有詩次韵謝之。

風日小春暖。舊交盟不寒。好同翰墨樂。共作海山觀。句麗花隨筆。膾鮮銀滿盤。地靈巖洞靜。笑對夕陽殘。

正氣書院聖廟成矣。喜而賦之。

古都人雋雅。新典績昌隆。二聖陪宣聖。以管楠二公配享學宮

隣闕宮。武威原博愛。謂楠公文德在誠忠。謂管公政教淵

源一。修齊宇宙同。甄陶培用平正氣。布濩煽皇風。虔祀

長無懈。休和鎮大東。

栗林公園雅集 分韵

雅集團欒飛羽觴。醉餘娛樂墨痕香。交情掬月亭前水。照我鬢絲千縷霜。

春雨

廉纖潤透碧窗紗。散入東風織彩華。吟繖翠流溪口



柳。漁蓑紅滴洞中花。釀成芳意醇於酒。醒了塵心冽  
似茶。幽韻靜情誰寫得。水絃一曲竹西家。

春草

雨後新茵遍野垌。輕輪輾去有餘馨。舟過南浦帆含  
綠。夢斷西堂句亦青。近却無兮迷蛺蝶。遠偏深矣失  
蜻蜓。衣香釵影東風暖。拾翠人歸夕照汀。

春烟

誰罩春光襯碧紗。輕於細雨薄於霞。吟情惱殺朦朧  
月。畫趣妝成暗淡花。垂綠晨籠雙鳳闕。散青暮入五

侯家。却憐禪榻風流地。一縷飄颺人煮茶。

春倦

暖風麗日奈吟情。晝漏緩時伸欠生。入幕栖檐嘲燕  
燕。歌喉簧韻笑鶯鶯。欲呼侍女煎新茗。慵與隣僧了  
昨枰。山色透簾簾影淡。不知林外夕陽明。

春醉

陶陶快適養花天。無復紛紛俗累牽。戲蝶影隨如學  
舞。垂楊絲禪好同眠。對山高臥劉千日。枕水閑吟杜  
八仙。也笑南華能解事。滿身和氣醉神全。



秋影

短者如長瘦者腴。不知庭樹向凋枯。衰殘柳傍蕭疎竹。摧破蕉交零落梧。只許道心憐骨相。豈將世色愛妍姝。婆婆憑仗斜陽力。描作明窗水墨圖。

秋雲

淡影尤宜疎樹間。無心又自護仙關。不留朱夏奇峰迹。只作蒼崖幽石斑。夕照映來時奪白。西風吹去似妨閒。何當脫却塵紛事。與汝同栖黃葉山。

秋扇

露冷漢宮秋可憐。班姬有怨入詞篇。人間寵辱豈非命。身外炎涼應付天。紈素經時雪逾潔。輕姿委筐月長圓。多才招棄吾何敢。笑殺當年孟浩然。

秋燈

疎樹漏光光更青。坐看淒氣遍林垌。濕烟罩處冷於水。涼雨灑時微似星。賣酒門前楓葉路。打魚舟裡荻花汀。夜深窓底相親好。伴得高人照古經。

秋月

露華湛湛廣寒宮。氣沁妙辭佳句中。舊賜衣裳恩更



遠。故都情意感無窮。蚌珠光動漁磯水。桂子香飄仙苑風。清影別添閨裡怨。立憑欄角數飛鴻。

讀史絕句

品格全同白樂天。野狂才思湧如泉。奈何只著升沈恨。西道謫行三兩篇。野相公

威靈文德照千秋。何說萋斐志不酬。煥赫和魂漢才誠。揭將四字護神州。菅相國

片石嗚呼磨不磷。忠魂英氣赫如新。遺風感化長無盡。東海出斯真聖人。楠公

船上想曾飄幟章。一家熊虎護天皇。廟堧今日青

苔雨。正氣猶聞焦粟香。名和公

處已清廉察事明。此公量度不平平。避賢欲博謙虛譽。早被人傳伴食名。盧懷慎

婉句麗章風雅存。枉將詞筆贊乾元。勿輕此老摸稜手。傳作槐庭不二門。蘇味道

欺主弄權真異才。休嘲立仗悉駑駘。破摧唐室金甌去。馴養漁陽鐵騎來。李林甫

淺智何知遠大謀。石郎畢竟是凡流。七年僅結榮華



夢。割棄幽雲十六州。石敬瑭

澶淵一舉逐羶腥。保得百年宗社寧。遺憾微言惹奇

禍。拂鬚有箇眼中丁。寇準

捧書訴屈亦狂痴。勿笑廟堂容此兒。借問平生羞恥

事。古今能有幾人知。高若訥

庭草不除心地空。蓮花香淨一池風。玄玄辜負經綸

業。夙在歐公冷眼中。周惇頤

### 勸善歌

聖化蕩蕩百物和。不知何以報恩波。君有旨酒且莫

酌。聽吾一曲勸善歌。皇嗣自古比天日。恭敬上下

結如一。厚澤二千五百年。寰宇之內無偶匹。奉公卽

是第一善。勸君念念在皇室。鞠之拊之顧復之。無

病猶憂有則悲。謝教顏訓愛如玉。不獨呱呱求乳時。

子也皆是奉遺體。當恕至情憶大慈。事親卽是第二

善。勸君可倣曾家兒。是是非非辨銖兩。德慧術知期

高朗。達學通理貫古今。視自有形至無象。聰明卽是

第三善。勸君平素慎所養。乃長衆人安萬民。古重斯

德呼爲仁。諭蒙容昧示中道。又爲一世護彝倫。禁奢



蓄財不是吝。擬施陰德恤窮貧。寬裕卽是第四善。勸君和氣宜如春。處事斷事尙果決。赤心亦當比金鐵。若欲一怒安斯民。祇合知恥守大節。剛毅卽是第五善。勸君勇武作人傑。接賓主敬身主莊。威儀從來非虛裝。乃式乃禮要嚴正。維佩是琚德之章。齊莊卽是第六善。勸君容止勿失常。千緒萬條紛紛事。非而似是頗多類。纔誤取舍宿心違。欲定方嚮應致意。只由公道棄偏私。辨知邪正亦容易。既得其宜適其方。直進無志不快利。密察卽是第七善。勸君事事顧大義。

信也唯能保一生。無輓無輒何得行。李下之冠瓜田屨。徒招猜疑又何情。守信卽是第八善。勸君當省誠則明。海內衆美實煒然。群物如花人如仙。正氣鍾集百和應。庶績雍熙德化宣。保內卽是第九善。勸君勿汗洞中天。閉居安知天下大。雄飛應遍探海外。可察群邦立國源。可察群邦致隆勢。一物之蹇亦可傲。只有尺進無寸退。取長卽是第十善。勸君駸駸進可銳。數至十善歌將終。歌將終兮意不窮。再勸三勸君聽取。孜孜要學君子風。一善易修何不企。一善纔成已



足美。爲善最樂。漢東平。一語千歲存良揆。君聽此歌  
誦此歌。實踐躬行致中和。上天有心必保佑。福多祿  
多子孫多。

十愛錄一

愛此陳編滿五車。青燈閱去夜長初。半經世事半忘  
老。盡是人間擲棄書。

爐上閑話

管廟吟筵席上  
得話字

交態如春閑境界。瓶笙聲裡評詩畫。紛紛雪虐與風  
饕。不上同人爐上話。

新蟬

能將脫化示真空。却放新聲攪俗聾。咽咽清音聽逾  
好。高槐斜月半庭風。

新苔

數畝自留花後馨。不教塵壒點門庭。羊求無到三旬  
雨。養得莓苔幾寸青。

全唐文一千册。全唐詩二十四帙。收在書齋。光  
彩粲然可愛。偶得一絕。

陶陶樂地寄斯身。縹帙牙籤情味真。頌讀半生多尙



友。全唐文士五千人。

小春十日。奉先考贈位南岳亦叙位之

恩旨。恭賦。

至尊登極日。金鏡燭幽時。馨烈乾坤感。休和草木知。  
恩波覃遠僻。餘澤及吾私。贈叙名雖異。衣冠班共隨。  
明經韋氏迹。同拜李家遺。聲和松陰鶴。花傾砌下葵。  
非才慚過分。勵志憶常宜。只識秉彝化。應裨不拔基。

七香齋詩抄終

大正七年三月十日印刷  
同 年四月十五日發行

(非賣品)

著者 藤澤南岳

發行者 大阪府東區東平野町五丁目百八十九番地之一  
藤澤元造

印刷者 大阪府西區新町通三丁目百九十九番屋敷  
日下伊兵衛

發行所 大阪府東區東平野町五丁目  
泊園書院



161  
42



